



KOMUNIKADU DE-IMPrensa

GOVERNADÓR REAJE BA PUBLIKASAUN DILI POST KATAK BANKU FEDERAL REZERVA NOVA IORKE REJEITA PAGAMENTU ESTADU TIMÓR-LESTE NIAN

Dili, 11 Marsu 2021

Governadór Banco Central de Timor-Leste (BCTL), Sr. Abraão de Vasconcelos, ohin rejeita publikasaun ida husi Dili Post sobre alegasaun ba asaun husi Banku Federal Rezerve Nova lorke nian (sigla iha Inglés FRBNY) ne'e loos.

Publikasaun ne'e ho título "Banku Federál Amérika Rejeita Pedidu Levantamentu BCTL Dala Tolu" ne'ebé refere ba Reitor Universidade da Páz (UNPAZ), Adolmando Amaral, katak FRBNY rejeita dala-tolu ona pedidu sira husi BCTL nian atu halo levantamentu hodi finansia orsamentu jerál estadu nian ba tinan 2021.

Governadór Abraão hatete katak Sr. Reitor, ne'ebé iha publikasaun nia refere ba fonte husi Banku Sentrá nian ida, completamente laloos. Governadór sente hakfodak ho reitor ida husi universidade respeitável ida iha Tim'or-Leste halo deklarasaun ida sein primeiru verifika uluk veracidade husi informasaun ne'e, liuliu tanba BCTL hasa'i ona Komunikadu ida iha lora 24 FEVEREIRU 2021 hodi rejeita informasaun sira ne'ebé sirkula iha momentu ne'ebá .

Sr. Governadór informa katak bazeia ba pedidu mai BCTL husi Sr. Ministru Finansa, FRBNY hala'o tiha-ona transferénsia ho montante \$ 200 millaun husi Fundu Petrolíferu ba Konta Jerál Estadu nian iha lora 23 FEVEREIRU liubá. Alein-ida-ne'e, FRBNY mós transfere tiha-ona osan ho montante total \$886.3 millaun husi konta Fundo Petrolíferu ba Konta Jerál Estadu niandurante tinan 2020.

Governadór hatete nia la konsege intende didi'ak razaun tansá funsionáriu Banku Sentrá nian ida hakarak fuga fali informasaun falsu hanesan ne'e. Funsionáriu Banku Sentrá nian hotu sujeitu ba Kódigu de-Konduta ida ne'ebé estritu tebes no, bazeia ba ninia esperiénsia, BCTL laiha tradisaun atu divulga informasaun sira ne'ebé konsidera la'ós públiku. Governadór mós akresenta katak Lei Orgânica BCTL nian kontén dispozisaun sira ne'ebé proíbe funsionáriu atu divulga informasaun *não-públicas*.

Governadór Abraão reitera fila-fali ninia deklarasaun pública liubá katak Banku Federal Rezerve Nova lorke nian kontinua sai parseiru valiozu no konfiansa ida ne'ebé apoia ona BCTL iha jestaun konta Fundu Petrolíferu dezde inísiu iha tinan 2005.

[Ramata]